

四庫全書

史部

欽定四庫全書

靖康要錄卷十

閏十一月一日制曰朕紹承基圖綏御黎庶贊元經體
是資大德之臣保定豐功尤賴非常之佐我有雋傑若
時登庸出命于庭用實爾衆大中大夫守門下侍郎何
稟識邃以遠氣大而剛蜚騰英聲冠冒多士挺挺不撓
隱若棟梁之隆蹇蹇匪躬屹然社稷之衛比由詞苑進
翊政機務陳義而納忠每推賢而揚善底乃嘉績簡于

朕心屬天步之多艱當兵戎之方戒相予以濟非汝而
誰是用憲祖朝之典章正台衡之秩序躡升右揆兼侍
西臺陟以班資敦其邑采於戲姚崇應變遂致開元之
隆林甫伐謀已還貞觀之盛惟登明選公以熙衆志惟
揆事圖策以取萬全緝治功于苟簡之餘起國勢于衰
靡之後海隅靖謐疆陲億寧朕以蒙成爾亦多譽可特
授通奉大夫守尚書右僕射兼中書侍郎制曰朕置
相之方每加慎其選擇惟遇臣之體必務全于始終眷

時次輔之宣勞方以引辭而均逸肆盼明命孚告治朝
光祿大夫少宰兼中書侍郎唐恪才博而通智精以敏
早由釋擢多出踐揚外分師閫之權蔚有嘉績入長地
官之劇綽著顯庸逮朕贊圖名寘樞院進參政本超貳
宰衡惟托付之甚尊亦夙夜之匪懈屬以敵騎薦擾郊
畿驛騷預備多失于事機建節或成于稽滯以疾來諗
申諭莫回是用畀秘殿以班榮即殊廷而置使密陪經
幄敦衍邑組嗚呼寵數之加頌豈忘于留眷忠誠之報

宜勿急于告猷尚其欽承以永譽處可特授觀文殿大學士中太乙宮使兼侍讀制加鎮海軍節度劉延慶為樞校少傅依前上清寶籙宮使初畫河之議一出衆口籍籍喧騰于上御批付唐恪曰畫河之議萬口一詞罪不在朕卿其詳之恪因乞出乃有是命呂好問除兵部尚書張叔夜首先勤王除延康殿學士劉韜棄軍長冠禍國搖民落職與宮祠侍御史胡舜陟奏臣昨奏狀條具備禦得失事其一云今大臣皆非其人唐恪聾昌

尤務為奸臣所指言非虛語也皆有實狀恪天資貪猥
素無行義知滁州日貪汙之迹尤著在任委屬邑買木
不價其直載至和州蓋宅凡瓦竹之類悉自滁往匠人
役夫皆滁兵也以充私用當時為臣僚所論遂罷州事
其後蔡京復相引為戶部尚書京罷出知潭州今春已
召參預政事邊方大計自宜與宰相協力有為若宰相
強愎自用當以措畫之方告于陛下安可坐視伺其敗
而奪之位為自謀則善矣豈不誤國乎及恪為相至今

邊事亦何所措畫不過如徐處仁吳敏充位而已然亦不若處仁之不為奸也恪之智慮但長于交納內侍百端王若冲與為密友凡諸督御皆以諂諛結之比召李穀至中書議事聞穀之言徐以手握手之帶曰至道處置安有錯者諂奉百端吏皆鄙笑凡內侍送御封文字至其家無不促席深結臣頃侍班上殿親見恪與內侍昵昵耳語久之不已自昔宰相為奸必先結宦官刺密旨以中人君之欲又使之言譽稱美以固寵位唐李林

甫近世蔡京王黼皆用此術正人端士肯若是乎詹度
燕瑛胡直孺皆天下之至小人恪黨比之臺諫交攻不
肯施行聞嘗受度瑛直孺貨賂故曲庇之恪本州縣俗
吏素未嘗識賢士大夫而賢士大夫亦恥與之接故今
日所引用皆庸陋貪冒之人省部郎官尤為冗雜獨任
私意遂廢資格言偽而辯反是為非譽邪為正昔在蔡
京門見京與其子脩論時事而各為語言士大夫皆能
道之以為口實此少正卯之徒聖人所必誅者往往在

陛下前言語反復後不如一近日棄地與不棄地皆自其口出大率言行皆效蔡京如近議三鎮不欲出于已今集百官廷議上即揚言不棄地以議棄地者分為三等此京分上書三等無異京以上書分三等寘之中典以杜天下之口而肆其奸今恪又欲以三等罪士大夫見事勢迫切不可不與地而奸計不得行使敵稍緩士大夫得罪者多矣朝廷復有大議誰肯言此亦杜天下之口而肆其奸也若廷議之後急遣使行敵兵不至河

豈有求河為界之事敵未嘗求輶冕尊號即急與之其
不知幾如此可任天下之重乎自夏以來所用以為宣
撫者提兵而出係國家安危李綱李彌大折彥質士大
夫皆知其不可恪豈不知之知之而不言聽其敗事豈
為國之心哉國家天下之大固不可盡責其擇賢太守
如河東數郡及懷衛河陽鄭不能擇忠義有謀守之如
敵長驅而入無人之境守河以議都城亦不擇人而用
之使兵望風而遁汜水闕之險密邇都邑亦不預為之

備令京師守禦疎畧兵將無所統一人情不能安堵則
宰相何用哉其無所能概可見矣何知為奸以誤國事
豈不負陛下寵任乎聶昌則奸人之雄小人尤凶暴者
因陳邦光引為蔡京之客次擢為戶部侍郎未幾尹京
欲為蔡京中傷王黼反為黼所中而罷居鄉郡以州縣
之勢豪奪人之田宅州縣請託招權納賂無所不至為
臣僚所論責居湖外蔡京方圖為宰相以昌凶悖可用
遂召至闕今春士人伏闕昌為尹詣太學為諸生曰王

時雍欲盡殺公等而昌勸之遂已豈不見時雍親戚皆
請假去乎以虛言悅士人因上書薦昌樞密院者甚多
昌之詭詐不情大率類此撫州范世英訟昌奪其物業
昌曲法編管世英行遇殺而卒使管押之人害之也復
追世英之父與祖丞府禁獄雖有指揮送大理而昌不
法遣使大理官就府推勘自有刑獄以來豈有是事理
直何必留府欲世英三世被害慘酷如此豈人心哉閭
門祇候陳申怒其教世英作狀追捕繫獄毒楚備嘗鞭

兩股皆爛百姓左二人為世英送食昌以事誣之庸決至死刑之冤濫一至于是夫怨氣傷天下之和不致上帝之怒乎江鋒昔為撫州教官與昌有隙鋒北至都城輒差人押出門開封捉事使臣范振受賊三百千大理勘編管昌乃留密院生殺予奪之柄皆在昌乎殆不復有朝廷矣蔡京童貫愛婢皆畜于其家貫有名馬有指揮令昌取納乃送太僕寺因賜馬取為已有方軍用度不加之時開封有錢宜助國用昌乃請萬縉為私費嘗

為臣僚所論守禦司寄姓者甚多如術人柳彥輔及號
知足道人者皆與官寄姓名緩急之際何賴焉今日募
兵尤為急務諸路差人召募皆昌故舊輕薄小子姓謝
丁者是也布衣與官不問能否各與官告數十道使之
妄用京城望兵如渴思飲昌乃以為私恩豈忠君體國
者乎宰李平西庸陋不才家有美婢而昌悅之引為少
尹復使權樞密都承旨方用兵之際承旨豈容不才者
居之唐恪與昌奸雄可畏牢籠使為已助昌恪有力亦

深結之士大夫目恪昌為死黨朝廷有此二奸所以政事不修威令不振人才無一可造者將士莫肯用命不足怪也昔季梁在隨楚人憚之宮奇在虞晉不窺兵國有人焉故也今文武二柄乃付二奸是宜敵人侵侮土地貶削而國勢危蹙矣伏望陛下睿斷赫然竄之天下幸甚奉聖旨唐恪除觀文殿大學士中太乙宮使是日敵攻善利門告急殿前司姚友中選武庫神臂弓硬弩一千五百人救援是日奇兵作亂殿王健殺使臣

數十人內前大擾殿前太尉王宗濋戮渠魁方定先是
王健余創奇兵有識者鄙之曰凡兵用之則有奇果以
盡奇乎一時招集皆叛亡無賴富強之徒故有是亂

百姓殺東壁統制卒康以指揮城上兵不見敵火不得
放箭礮百姓疑為奸細故殺之 以張慤為北道都總
管 手詔朕以宗廟社稷之重與軍民共守命駕登城
拊勞將士誥爾衆庶毋致疑惑

二日駕幸東門勞軍賞賜孫覲為支軍糧賞賜不平降

三官罷以王時雍代之 是日尼瑪哈軍至城下先是王及之告和軍前二將有割城地金帛之要及之乃曰及之奉使朝廷不易信莫若元帥親至城下遂與俱來以及之下獄宋伯友棄鄭州歸京師以為提舉守禦命以下有言者落職宮觀江州居住西道總管王襄棄郡去澤守高世與以城降即偽除京西河陽守燕瑛棄城欲去為亂兵所殺司錄事等率郡官以城降河東諸郡或降或殺殆盡為河北頗有堅守不下者始朝廷以敵去

歲駐軍孚生監命都水使者陳求道等先決汎渠水灌
西北郊牟駝岡窯務卒因從大劫船燔數十里敵帥固
倫尼伊拉齊貝勒左副元帥曰國相尼瑪哈者也青城尼瑪
哈自河東入者也太子副元帥曰二太子阿里布者劉
家寺阿里布自河北入者也其餘敵寨多在東南初窯
官李穀典治兵械秋末上命穀閱兵劉家寺穀因取兵
器礮坐礮石置寺中不知數目至是盡為數用京城震
恐盡土諸門乃命官守四壁東王時雍南李擢西邵溥

北安扶孫傳為都大提舉四壁守禦使何槩兼之四壁各清野有事相關敵人甚危之又以東南受敵增立守禦東劉延慶南郭仲荀四面各一宗室兼提舉十步一將十步一步長十長一統制又每壁各置彈壓官及其官率移易不常又諸門悉以宗司啟閉初金人未渡河京城苦寒日者王俊民上言可借春以召和氣詔從之是日迎土牛于開封府前且令新城益張青旗以應木德仍自東壁始卒康宗于翰輩號持衆務整已律士卒

厭苦之或諷百姓康宗反矣不然何以易旗幟衆不知其情乃趨宣德門聚數千輦登聞鼓置東華門撾擊號叫京尹及彈壓官皆不能制衛士自樓上射之衆驚走遂趨東城擒康宗殺而磔之并部將十數輩皆死至晚稍定彈壓官推其尤者一二人斬之是日敵攻東水門矢石飛注如雨或以磨盤及碌碡絆之旋為風礮王師以纜結網承之殺其勢又門裏跨河築月壘以拒之駕幸東辟撫勞將士范瓊遣班直五十人下城已殆賴劉

光國援之而免敵攻通津門甚急姚文仲領千人下城接戰殺傷甚衆

三日駕上封丘門 聖旨李綱復元官除資政殿大學士領開封府事限指揮到日下星夜發來赴闕仍曉示軍民 駕幸北壁劫寨兵來効級者賞賜甚衆敵晚攻東水門甚急遣數人縋城禦燒毀其礮駕五鷲車二然礮架所存者尚七座其未立者不可勝計

四日駕上鄭門幸西壁南道總管張叔夜以兵四萬會

城下詔以叔夜為延康殿學士駕登鄭門即以馮澥與
蕃使自軍前來也澥云尼瑪哈初在瓊林苑已而入青門
夜攻宋門鼓聲甚急范瓊劫寨者回獲殺數百東水門
又築夾城

五日駕上南薰門幸南壁詔用太祖儀衛務從簡便以
障泥乘馬不除道馬行泥淖中或穿巷循堤而行躬擐
甲胄登城民皆感泣及食時却御膳再取士卒食以進
支賜有差下至准備差使猶二十千每壁文武官幾七

千員所用不可計其衛士對御血戰者有功賞之尤厚
駕幸戴樓門召見張叔夜陞為資政殿大學士就解何
桌毬路帶賜之先是諸道兵未至叔夜率先勤王以其
二子領前後軍屯陳州門屢戰有功敵少却又詔叔夜
為簽書樞密院事以南道兵入城數日不窺諸肆獨攻
東水門尤急孫傅夜宿城上初何桌孫傅議敵之再來
止緣去歲結和厚賂今不可復唱和議又苦無兵以戰
乃閤門堅守以待四方勤王之師京師之兵不滿十萬

秦元所教保甲雖衆然怯懦無足用嘗有五千餘人聚食朝陽門外敵騎六七疾驅其前衆棄兵潰走敵亦知我之虛實無所憚既而勤王之師迄無至者未幾東道胡直孺為敵生得執以示城上都人益恐 蕃帥魏三
大陷州 解于可除右司郎官

六日馮澥尚書左丞耿南仲依舊門下侍郎其請給等接續支破 金人連東水門陳州門朱門帶下寨自後日攻東水門尼瑪哈兵薄南壁與配泉觀相直敵能以利

誘諸謀者反効以情敵初到即力攻東壁通津門子城時劉延慶頗練兵事措置獨有法遇夜即城下積草數百爇之以驚時有獻議置九牛礮者雖礮磨皆放東壁用之法嘗碎其雲梯詔封護國大將軍者敵知東壁可攻於是過南壁以洞子自蔽軍新土竇護龍河初決便水益深至是皆氷合敵又為梁安機石矢石不能及或說我軍宜出兵擊之且焚其梁令腹脅受敵將吏笑曰慎憂乘城一夫當萬使敵傅堞獲之尤以為利然至二

十五日城正自此陷 蔡京賜第及都尉宅火城中驚
擾 大名府進士司文政上書力陳不可戰恐城破稱
臣不可及何稟大怒取聖旨處斬號令 都尉尚子辰
向子房不合擅便上城各降一官 御筆范宗尹首議
割地今戎馬再至朕失天下人心先次落職續除集英
殿修撰差提舉西京崇福宮

七日金人遣使來講和 是晚王宗濋領牙兵千餘人
下城與敵接戰高師旦知是夜姚友仲正築南拐子城

敵交鋒在北拐子城下躬率將校施放弓弩監督礮石
凡所陳為礮箭所臨雖不少負亦不大勝敵勢稍沮
八日攻陳橋門尤急東水門大戰

九日金人遣使借糧議和 李毅先次除名勒停次早
宣化門告急姚友仲領守南北拐子城所以不扞禦水
門者以水門不可遽犯故急攻二拐子矢石如雨樓櫓
皆壞朝廷為防秋之計上親幸封丘門城外接砲錫賚
不貲礮架礮石盡在城外劉家寺敵守攻善利通津二

門不三數日間城下立礮架僅百餘座盡是劉家寺者
但添得生牛皮包裹並濕榆木緣攢定裝軸脚而已

張叔夜除簽書樞密院事

十日龍德寧德兩宮出錢助國戚里豪民亦如之或以
酒食犒師 金人許和以都水丞李處權右司郎官司
馬朴為報謝使徐俯與郡一冲不職降一官 張叔夜
與孫傅同措置四壁依舊南道都總管餘道並聽節制
十一日裝七星礮六部人吏及富民各就車運礮石上

城詔賜河北朕即位以來無罪無辜而金人入寇不已至兩路引兵一歲之間再犯京城朕每與講和以求息兵言及割地如剔眼肉非是棄河北之民也欲與金帛取贖以復舊疆今事勢危急四方宜同患難京城失守則我赤子盡陷異方矣永在塗炭詔河北一路盡起軍民之兵守臣自將陪道並行星夜前來殄滅巨敵以安王室天下平定與汝共之除賞賜外軍事復補官資百姓免五年租賦 制加鎮海節度劉延慶為檢校太傅

十二日開戴樓門許百姓搬門外柴炭木植等賣仍發
卒二百人下城打護龍河兵 劉韜以守禦無狀落職
留以自効除劉延慶為使敵築望臺度高百尺下覘城
中又飛火炮燔樓櫓旋即修繕又造雲梯施大輪以草
冒之乘罅推以逼壘將士以鈎竿柱之使不得進近則
以鈎子取之發火焚梯敵數引却軍士擊九牛弩一發
而貫三人

十三日金人掩殺運柴百姓入河范瓊以兵救之 雪

晴李處權使西軍回不見尼瑪哈亦不受書云自遣蕭翼
計議 是日金人陷亳州

十四日駕再上城擐軍勞軍殿班撮城下戰勝賜賞之
金帛駕幸東水等門撫諭軍民守禦提舉李擢降兩官
落職罷以田浩代之初護龍河自敵迫近即汙水以增
其深其後雪寒冰合敵于冰上布板置草覆之以土將
以攻城而擢不介意是日稍晴上登城見城壕填壘殆
盡乃有是命駕御朝陽門敵兵十數逼城出不遜語衛

士三百餘乞下詔從之遂與合戰中有執盾者二人獨奮身躍入至手殺五六十輩而餘兵不進詔促使援之卒無肯前者二人競死上不憚因下城初有制城樓禁火士卒噤戰不能執兵至有僵仆者然上在禁中徒跣祈晴又撫問存卹絡繹不絕多給衣襖務令溫暖衆皆感泣不敢憚勞以勤王不至時令挑戰以示敵然可用者獨有衛士三萬爾每出數百人雖多獲級以歸然亦失十五六至是死亡以數千人敵又遣使議和須上或

上皇出郊詔不從復請以近上親王詔遣王行將出敵
具兵以迎因不復出獨遣馮澥代行敵聲言失信攻城
益急南壁惟宇乃家號二樓最危時壕池已為高陵敵
既逼城旁近七八樓爭發矢石動以千百計既非受敵
往往虛棄或止之則衆指為奸細而殺之敵伺城上稍
息拾矢石反射城上交下馬如雨弓弩多不能立礮亦
良久乃能一發傷者甚衆給賞官皆應給不辦又樓櫓
之屬為矢石所壞換易不及每一柱一板率厚賞寡人

既而有中礮碎其首者有為流矢貫之于柱者人皆莫肯施工不得已逼使之或請以壘石壘壁可免換易從之頗亦以為便既而灰棚多為礮石所損因以布囊貯糖為籍其下即用火牛車以備雲梯之來其制高於城以繩貫竹木似梯而彎其下施平板板上下龕蒙以牛皮可數人以据城又其下即輪軸乃鶻車也箭所不能入獻撞竿者其制用長衣數丈上施橫木數尺下以鐵作軸雲梯之來迎擲之應手急索則梯可倒急攻之際

嘗用之壞其二樓殺敵千餘至是日撞竿不及敵因就其上以長竿升火燒樓櫓糠袋及火牛車不可向邇頃之敵稍登城有執盾者禦乃下是夜緩攻

十五日大雪駕亦登城三軍鼓舞聖旨金人犯順中外驛騷益朕不德之致今月十六日可避正殿開萬勝戴樓門縱民樵採 聶昌至絳州絳州人殺之

十六日金人填護龍河度鴨車以攻城是日于陳州門近東填壘壕池人于皮洞子內負土矢石不入 駕幸

南薰門雨作泥深

十七日過登天樓來攻東水門聖旨宣化門東壕內敵兵紱杙盧襄臥疾全不措置不自請罷滋長敵計可落職與祠李擢喬師中坐視敵兵進杙壕河中三分之二顯見守禦無方各降兩官為弛慢不職之戒

十八日金人過鐵龍爪來鈞城上敵樓戰棚遣忠訓郎閣門祗候秦仔賚蠟封文字詣康王奉聖旨訪知州郡糾合軍民共欲起義此皆祖宗涵養百年忠孝之士天

地神人所當祐助檄到日康王可充兵馬大元帥陳遘
充兵馬元帥宗澤王伯彥充副元帥同力合謀以濟大
功李處權以再遣辭行付御史臺獄 詔張孝純贈開
府儀同三司張決贈徽猷閣待制餘並贈七官選人贈
承議郎與恩澤三貲監司與恩澤五資

十九日敵侵晨以大橋三置火其上相徑攻水門拐子
城搭村四人鋸斷橋以水沃火因撞竿折其梯墜者甚
衆三搭村死之

二十日遣使出和要親王出盟 樞密院劄子金人犯
順直抵京畿虜掠居民憑陵郡邑雖有議和之請未聞
三舍之期主上出宮禁之藏御士卒出戰然有難塞之
欲繼生無厭之求近日于都城四面作雲梯轎車等窺
伺間隙攻打堅城多設虛寨遠置疑兵欲絕聲援樞府
職當機密親履艱危雖上聖垂仁猶欲按兵而講好然
大臣仗義豈能顧位以偷安念萬里之幅員率四方之
豪傑乃父乃祖被聖神涵養之休惟孝惟忠實臣子願

為之事宜殫大節圖報上恩恐號令之未分欲施為而
不敢如檄書到日應帥府監司郡縣守貳令佐悉許不
拘常制起勤王之師如見起發仰所部令官併日催促
前來救護京室如有起去處不拘遠近內外許鄉豪傑
遙相勸率招集驍勇不限數目各自催排首領前來或
有逃散去處山林自專結已成隊伍許具名申所在官
司不拘軍人百姓亦許自効隨事便宜四面攻討其所
殺獲隨事以聞自節錢已下已有立格推恩願忠臣義

士相與竭力以成大功時不可失劄付開德府關牒前

路火急施行

知開德府王棣除顯謨閣直學士

二十一日遣郡王二人及曹輔馮澥出使 增修東南

二辟提舉官安扶罷以劉韜代之

二十二日金人遣郡王回要親王并何稟

二十三日遣京畿弓手出戰敗死千餘人是日大雪太
乙寨兵于東水門及陳州門東立天橋數座下瞰城中
有榜募能下城焚毀者白身授團練使

二十四日敵遣使來議和 砲中田顯立死進五官待
制陳州門火焚戰棚者三即撲滅而新之 是日早敵
推大梯四乘來攻字宇字號樓子三乘為撞竿所壞獨字
字樓子撞所不及火延燒三樓子敵人皆登城舞點旗
鼓噪然為樓子火盛不可過姚友仲仗劒擁班直守禦
官軍兵救火弓弩交發敵皆墮殺傷者甚衆敵遂退是
日大雪我軍放火牛燒金人洞子反延燒宣化門東敵
樓二座陳州門也金人十數乘火作上城守禦人掩殺

而退然攻城益急用撞竿燒其雲梯二殺敵千餘其次
索撞竿竿不及敵因就其上以長竹扎草延燒樓櫓糠
袋皮火牛草延引不可向邇其貯水桶皆冰合三樓頃
刻而盡敵幾登城矣得牌首僅百人禦之而定其夜緩
攻前此軍頭郭京者妄稱有李藥師術募無賴輩數千
聚天清寺號六甲正兵初為成忠郎尋遷武翌大夫每
以危急告之京領笑而已民庶語及京者輒以手加額
時何桌募奇兵五千兵屬於京有士人上書孫傅其畧

以為自古未嘗有以此成功者其朝廷或聽之宜少付之兵俟其有成乃稍進任今聞衆至三萬或失利則為朝廷羞傅怒謂客曰京殆為時而生敵中瑣細一一知之幸公語傅言若與他人定坐爾沮師之罪揖而退之又有劉宗傑傅臨政之徒各募衆或稱六丁力士或稱北斗神兵或稱天關大將率効京有識者危之嘗曰非朝廷危急吾師不出至是乃登城豎旗會天王像指示衆曰是可令敵膽落矣衆亦莫測是夜宰執宿門上

二十五日大風雪金人攻陳州門驚車洞子雲梯矢石如雨午時遂登城守禦人棄擲兵甲下城走既而東水門之南亦破金人下城縱火殺旁居人殆盡都人自殺及棄男女財物於河井中者不可數初欲洗城先劫曾帝姬往軍前既而傳三元帥令殺者族遂止是夜南薰門陳州門東水門大火光如白晝先是四壁屯京畿保甲及軍士共七十萬每壁提舉一員同提舉二員使臣十人右僕射何㮚樞密孫傅曹輔皆在城上又旋募無

從兵馬以草澤為統制如傅臨政裴淵陳德之類凡九
十餘頭項其後又以丘濬感事詩有郭京楊適劉無忌
盡向東南卧白雲之句立郭京為將人爭從之朝廷因
命為統制識者知其必誤國也又諸統制自皆號令不
受樞密節制既不齊一專務姑息人不畏威加之賞罰
不明無以勤勵遂至失守如劉延慶并子光國衆咸惡
之指為罪魁其日猶拜少師初郭京既為朝廷用募不
復其武勇但相視面目正以為去取有武臣欲為偏裨

京不許曰公雖材武但明計正月當死恐為我累其誕
妄自任類此或言援用之初試其術有異京因謂金人
唾手可取與內侍輩尤尊信傾心待之是日大啟宣化
門出師門去敵不百步又天已明人固以疑之先是每
出師城上皆持滿待我師稍却即并力以射用此退敵
京欲出兵乃令守禦人皆下無潛覘軍恐失大事獨與
張叔夜坐宣化門氣城頭上以親兵數百自衛兵才出
即倡云先鋒劫寨奪馬數百匹矣都人皆喜歡傳增數

千其實妄也初敵陳州門外京自內出正當其鋒我軍
數百人方踰壕敵二百餘騎突之皆沒河中迹踐殆盡
哀號之聲所不忍聞敵因趨門方急呼守者禦之吾衆
已亂出矣京見事去即白叔夜云須自下作法因以繩
引餘兵南遁已雲梯輻湊來者不絕初朝廷募有能下
城得敵旗者給銀絹至是一人身帶十數其卒爭取各
詣其長求賞但見黑旗旁午人方疑駭而走泊六人者
登城衆遂披靡實午未間也衆既潰散城上連呼弓弩

手至隨後追之終不回棄露刃填隘里巷聲言扈駕而出叔夜度不可支下城遇亂兵劈中三刀敵先焚通津門宦者黃經臣望闕再拜大慟躍入火中死守禦盡散惟田灝死之詔贈待制官其十子敵入配泉觀衆止數百人我衆望之奔潰無敢與之敵者俄頃潰兵與百姓自南至北者摩肩接迹舊城門皆閉遂從舊宋門河上穿腳門而入或渡河而過嬰兒襁褓棄死道側者籍籍慟哭之聲震天公卿大夫率攜妻孥衣敝布匿委巷小

民家劉光領西兵秦元領保甲從北門斬門而遁敵登
城者未下而京師驚擾四城樓櫓皆遭焚燒火燄突起
急風中東南為甚初敵遣使者劉晏等四人促和朝廷
館之都亭驛及是百姓趨往擒之晏等呼敵曰我來促
和正為若等母殺我衆不聽皆鬪之有以是報阿里布
者曰爾時南宋已無號令不可罪渠日晚上登東華門
宣百姓授甲擲兵器樓下這之時大軍既潰民無鬪志
授甲者俄頃輒棄之至夜中官等並逃出宮廷無一人

唯景王妃梅執禮秦檜謝克家三四人在上左右傳宣
命令因詔謝克家授書往軍前出不由門縋城而下單
馬一二人隨行從南薰門間關至劉家寺見二太子至
二十七日有殿班指揮使蔣宣集衆數百人欲衛上冒
圍出奔上猶豫即陞殿挽御衣挾上上急顧宣曰汝是
何人汝是何人敢爾宣置上以足頓地曰臣不顧死欲
盡忠陛下陛下不用大事去矣上託故還內秦檜委曲
諭之云汝等護駕而去果保全乎衆默然檜曰我今為

汝告官家更將書往軍前試看如何衆唯唯於是檜復請往其衆或以兵擊牕辟暴甚因盜內庫器皿莫敢誰何賴上親出涕泣慰諭時左言亦為殿班指揮使彈壓之稍定因擢宣為防虜使以安其心又云是日早大啟宣化門郭京出兵敵來攻字字樓子皆頽毀處置未成撞竿未備敵遂登城衆潰城陷京師被圍朝廷急于命將有郭京者京師盛傳用兵六甲法可以生擒二尊其法用兵七千七百七十人嘗自試于內朝廷信之不疑

錫以金繒數萬計使自募兵恩數備至人皆呼為郭相
公其所召募皆市井游惰色色有之不問武藝精否但
擇其元命合六甲法者有賣線兒京一見授以將命他
皆類此敵兵攻圍甚急京談笑自若云擇日出師凡三
日可至太平直抵陰山而止其所招軍但欲砍首級不
必戰也前期至天王旗每辟三面按五方色或畫天王
不知何法也又有劉無忌乃賣藥道人常以身倒植泥
中乞錢亦作統制官蓋取丘濬詩有郭京楊適劉無忌

皆在東南卧白雲之識初郭京出延頸俟捷于宣化門者已千萬人俄報云郭京前軍已得大寨懸大旗于敵
壁矣又報云前軍奪敵馬千匹矣又遣使臣傳令樓子
上除守樓外餘並不得上蓋郭京以六甲法能使人隱
形未脫口敵兵分四翼鼓噪而進衝斬前軍一掃而空
居後者悉墮護龍河吊橋以為積所壓不可拽以城門
急閉敵師大怒鐵騎沿城而上止用雲梯一隻可制五
十人初十餘人登壘官兵無一用命者城遂陷是日午

時也 京城陷統制官死者三人何慶言陳克禮死於
賊姚友仲死于亂兵劉延慶并子光國奪萬勝門帶班
直長入祇候西兵萬餘人而出皆護駕先鋒延慶陷金
門池而卒光國攜王黼愛妾張氏以逃行十餘里敵騎
追及之遂殺妾而自經 是日班直斧都亭驛門入執
敵使劉晏并從者三人殺之先是十一月二十八日詔
差翰林學士莫儔御史高世賞館伴斡里雅布使人劉晏
于都亭驛晏曰皇子元帥遣晏來云國相元帥一軍非

晚亦到元帥皇帝出城會盟。傅等答曰：「伯姪之間義均骨肉，與二元帥相見故無害。但事體不順，難以家至。」是晚都人見大兵已傅城下，但容車駕出郊。二帥此來，正欲彼此不失信。既許二帥却馬士庶軍民遮擁不放車駕，出城即失信，更大晏頗以為然。晏至驛便欲朝見上問左右大臣以前遣王油來不恭，不欲見之。孫傅何稟請留不遣。詔使人就館議事，不須引見。傅等奏不引使，人恐難為辭。亦恐劉晏不肯去，况贊雅布於本朝素號。

有善意令拒絕其使如厄瑪哈遣使來不審陛下還令朝
見否後勢須引對即于幹里雅布非便臣等連日與劉晏
語似稍識義理必非王汭狡猾悖慢之比上曰如此即
令引見晏果執禮甚恭奏對婉順上悅厚其禮幣晏悉
不受晏既去又數日尼瑪哈軍果到青城遣奉使知樞密
院馮澥引蕃官蕭慶揚誥薩里穆爾貝勒來使慶極禁
黠有口才薩里穆爾貝勒語簡而峻薩里穆爾乃女真人其
酋所親信者再差莫儔高世賞館伴次日引見上殿慶

等力陳本朝失信事謂如三鎮已許了兵纔退便不肯交割今雖是畫河國相元帥皇子元帥須要與皇帝會盟方敢退師上令儕等宣諭曰非三鎮不當割自是三鎮軍民不從因而遣使告大金覓三鎮之地却討三鎮稅賦增作歲幣本非失信慶又奏云大金收得貴朝詔書言祖宗之地尺寸不可與人上宣諭曰此乃前日臣僚獻議也已行貶竄自有國書回二元帥且煩太師諸人主張和議必相信敵使退至都堂堅執撫前說云相

公諸人須是與皇子就議方得穩便何稟答曰本朝自祖宗以來車駕惟是三年一次郊天出城平居未嘗離太一步况今大兵在外都人豈容車駕出門此事實難相從皇帝自有回書便煩太師諸人委曲覆之二帥敵使退至驛受書辭去又數日蕭慶又費尼瑪哈斡里雅布書來堅請皇帝出城會盟不然即圍城之軍決不解攻城之具決不退未攻城前若車駕出城二帥當執臣子之禮若城破後更無相見之禮若謂使人言語太過即請

斬之使人不惜一死此事乃是貴朝社稷儕答曰此事
恐終難允從至是遣李處權借太常少卿為報謝使兼
送閣門宣贊舍人李德充副之閏十一月十四日尼瑪哈
幹里雅布復遣蕭慶延札果幹薩里穆爾同李處權等來使
就差李處權作接伴使先與莫儕等相見曰奉賀這回
好公事且喜得早了當國相元帥皇子元帥云皇帝不
肯出莫是疑否儕答曰亦何所疑只是事體不順慶曰
國相皇子來特令慶等奏知皇帝不須車駕出城只要

大臣計議近上親王為質使待退兵候兩路割地了畢
即送親王歸倚等即時奏知蕭慶等又言來時二元帥
云陳州門濠已壞了三分之二長一里有攻城器具二
百車並來推上前如依得書中所言十五日放慶等回
和議便定不然二元帥云亦須顧慶等三人一面攻打
若一个軍人登城更無商量遂引之至殿上即奏曰免
聖駕出只要僕射何桌出城議事桌色變上亦不許宣
諭使人曰待遣大臣馮澥曹輔前去又請上皇皇太子

越王鄆王為質上宣諭曰朕為人子豈可以父為質如
皇太子數歲如何到得軍前薩里穆爾曰這事也有商量
如皇太子不須出去只告親王二人出城為質上宣諭
曰近請上皇出城蕭慶曰議事非僕射何稟不可如馮
渾曹輔皆衰老怯懦元帥決不信其言上宣諭曰馮渾
曹輔皆忠實大臣朕所委任軍前有事但與商量慶不
以為然莫儔高世賞請對力陳敵已不敢仰煩聖駕出
城其心頗回極不易得如宰相親王不可不行且如幹

里雅布前次到城下要宰相陛下即遣張邦昌要親王陞
下即遣康王肅王今兩軍並傅城下尼瑪哈兒悍有謀又
非幹里雅布之比豈可不遣宰相及親王恐貽後日之悔
肅慶曰館伴且須催貴朝遣親王早出城若更遲回恐
誤大事至上降內批侍儔等令再三說諭使人本朝宰
相只一員每日處畫朝廷事務應副軍前不可暫時闕
官已遣輔臣馮澥曹輔去諸事可商量莫傳高世賞以
曲說諭詞曉慶等曰須得何東并親王出城事便了兵

便退如或不然決定攻城若城破之後不知大臣做得
大臣親王做得親王麼慶等此後更不復來矣楊真誥
又索干戾人傳答曰皆竄嶺海不知存亡慶遽止之曰
在此間者猶不肯遣況干戾人乎授書相別乃閏十一
月十八日也十九日朝廷遣知樞密院事馮澥簽書樞
密院事曹輔代宰相宗室節度使仲溫事希代親王出
至軍前尼但置酒待之酒三行使送馮澥等歸不交
一談自此攻城益急晝夜不息二十四日劉晏再入城

是夜大雪深數尺莫儔高世賞見劉晏晏曰皇子元帥
令晏急入城修書不及兵已登城如力禦得住即極力
為之如力有不加即告皇帝早出來相見當悉保全宗
廟社稷須急遣宰相親王出城庶免攻破晏曰城上有
禦行徑全然未是便火箭燒著樓子何消倉忙若做樓
不及但用大木欄塞定多用長槍等待上雲梯人點令
刺墜可也晏見城上守得未是不可保次日引見晏奏
陳幹里雅布之意上賜晏金束帶退至都堂宰相執政諸

大臣猶不肯遣親王奉使儔等力爭之不從歸至驛雪大作未時候聞驛門外大擾守門兵士入報金人兵馬已登城諸軍班直皆敗走回朱雀門已閉少頃晏等被殺

二十六日大雪金人盡得四壁城上火益熾百姓扶老荒擾如初敗兵委塞里巷者往往肆行剽奪下城輩乘之兵火四起遣何㮚及親王為請命使秦檜李若水司馬朴相繼納款軍前至西北僻寂無一人乃伐城外林

木并斲取枢板作障反蔽城內炮架及籠巴皆回向內
城外盡作墁道城內者則塹為另橋不三四日皆畢初
破金人下令縱火屠城時何㮚率百姓欲巷戰其來如
雲由是斂兵不敢下仍偽倡和議人心稍安駕登樓宣
百姓遺宰相何㮚濟王議和午後何㮚濟王回同金使
四人入內 詔許高除名勒停瓊州編管 是日早龍
德宮聞城破太上皇帝為衛兵擁入禁城上皇猶豫間
衛兵欲殺內侍官鄭詳以下遂由金水門以入躊躇雪

中移時未知所向上聞之遣帶御器械王球領殿內帶
甲親從官二百人迎奉太上皇帝入居延福宮時寧德
皇后早已入禁中矣 又云早駕上宣德門見軍民越
王同吳升乞出和二帥令回要宰相何凜李若水自軍
前乞入城拉何凜出軍前奉聖旨何凜及親王出和當
晚許令講和議乃回堅欲太上皇出城相見 是夜五
嶽陽德觀大火 詔釋王及之李處權罪及之復吏部
員外處權以遺辭行付御史臺獄至是釋之 又云京

城十六門皆為番兵占守吾兵無一人在城上者當日早班直及諸處軍等奮力奔出者四萬許人京城大擾哭聲不絕而士庶近臣皆扶老攜幼藏匿于小街深巷之家婦女蓬首垢面自毀形容或入井或自縊半死半活而棄在旁者不可勝數

二十七日四更上御宣德門撫諭軍民兩國以和議各令歸業黎明雪止自城初破金人雖數令不得鹵掠然擅下城執弓箭搶刀于貴家富室劫金帛駄馬子女每

數十人作隊者甚衆小人輩因緣為奸或為指蹤或髡髮皂裳効其號呼秉炬公肆虜劫是夜又火雲騎橋明達皇后孟昌齡等宅神衛營藍從宅沿燒數千間民見東南火作爭走西北悲哭不止幼稚棄于河者益多太守徐秉哲出舊城撫諭今日敢劫掠者從軍法王師及城上敵兵皆釋甲小民過城者敵人擲錢乞之或往復或十千語人曰元帥限我輩三日破城今止日半見効諸門先積金帛如山敵悉得之所棄者錢耳敵帥堅欲

上出郊親議或太上皇皇太子亦可上初不肯出大臣
有請行者上堅不從且指衣帶以示之曰事急有此而
已既而手詔曰金人堅欲上皇出郊朕以宗廟生靈之
故義當親往咨爾衆庶母致驚擾却悞大事又云是
日駕登宣德門赦守禦官吏軍民之罪皆稱萬歲城中
民趨陽德五嶽觀盜官錢天大風雪屍橫道路爭食之
入更雪霽長星見焱出丈餘四更沒是夜馬草場堡真
宮火又云是早朝廷差人及出榜告諭城中軍民等

已和議了更無殺戮人情初安然何卓在外與金人畫一以十二事和議如割河北歲幣稱藩括金銀之類未定間金人須要上皇為質

二十八日雪止日色甚明赤人皆言不祥又訛言下晚洗城于是大街居民逃隱窮巷惶惑不知所以為豪右被毡毬婦女以灰墨塗面百計求生是日有榜云朝廷所遣使回大金已許通和只候何卓入城便作講和盟誓仰軍民等安心著業其潰散者各放罪不得驚擾有

違約束以軍法施行或有詔文武百官秀才僧道父老等相率詣軍前謝二元帥兵不及城全活性命之恩願犒軍者聽以金帛牛酒何桌等四肆守城兵盡放入和議已定帥遣皇弟大王十一人詣軍前謝之晚差范瓊四少尹并相官彈壓舊城外府尹三街彈壓城內民稍安堵然敵間下城焚劫州北皆黑水兵尤暴橫遠節制宅皆火太學律學一空待漏院登聞鼓院樞密院寶籙宮窗櫺皆決壞

二十九日天陰稍晴城中軍民或詐為金人縱火劫掠凡捕千餘人稍止百姓分其尸頃刻立盡自後日日有之晚有黃榜以當親往郊外是日百姓相率往謝二元帥以竿揭金帛者自門內抵南薰門填隘于道路皆却而不納自二十五日至是日士庶皆攜老幼渡汴履水入內城雖貴戚無不布衣塗跣者

三十日黎明開朱雀門上御馬素隊三百人詣青城見二帥至南薰門南立馬移時候報敵悉隔下兵衛許百

人從都人自宣德樓至南門泥雪中立候駕回敵見上
皆以手加額焚香而迎是日未許相見車馬宿郊外衆
聞之皆惆然夜有榜示奉御筆徐秉哲曉諭軍民各令
安心勿得驚擾來日入城當與軍民共慶初是駕不欲
往而太上皇欲行故出都人獻物隨駕往者不知紀極
有旨候駕回乃前 敵既據新城晝不敢下遇夜或五
七人至數十人潛虜掠而已然呼四百出城使交馳又
令數人居都亭驛為承受方城破之初文武官蹂踐及

踰城死亡者甚多官軍約十七萬潰散幾盡至是招集
纔二三軍前來索蔡京王黼童貫詹度陳遘李綱吳敏
徐處仁張孝純等家族是日先以蔡京家慕容氏母子
并京二小孫以往

十二月一日上宿郊宮與二敵帥未相見遣使者議和
事上將去表凡數次改是日闕傳乘輿還百姓自五鼓
相率守南薰門敵路已午間南薰門忽開莫不忻躍已
乃宣取酒果申後韋壽隆入城傳詔來日方歸又出黃

旗云和議已定各宜知悉益惶惑不安至夜有投宿御
廊者婦女小兒用襍裾盛土于馳道以雪泥未乾不曾
治道故也家家焚香以禱是日敵來求劉晏等四戶以
骨還之晚有一榜云奉聖旨上和議已定止是往來數
未必竊慮軍民等疑慮令曉諭告令知悉一云承大金
軍前闢金人雖在城四壁不令下城如有作過及乘勢
作閑之人仰一面收捉並以軍法從事又云是日微
雪講和方定孫覲草表質明曹輔韋壽隆邵溥賚黃旗

歸報傾城迎駕數百萬人自闕至南薰門填咽不絕至暮散歸皆以情乞詣軍前獻金帛牛酒謝過敵人不納是日皇弟康王開兵馬大元帥於相州

二日日出無光有飛雪數片聞劉延慶出奔為人所戮是日候駕人稍少皆云必未回申時忽有一使臣馳馬而來云駕回都人驚喜奔至晚駕入門父老交道山呼拜于路側老幼掬土填塞雪淖不須臾御道坦然或捧香前引或衝突禁止葬項然臂以迎者不可勝計

皆攔馬首而泣聲聞遠近帝亦為之掩涕入宣德門帝仰泣數行左右悽咽不得語從駕有金人數輩見上得人心如此亦皆驚嘆久之是日午時稍晴頃之微雪乃受降時也初鑾輿之出駐蹕齋宮遣宰執往來議事易表者四數其畧云三里之城已失藩籬之守七世之廟幾為煨燼之餘久煩汗馬之勞輒効牽羊之請此孫覲詞也至是始定乃往青城見二帥迎于門上設香案望金國設拜以表授尼瑪哈受之相揖而入御馬行於

前二帥次之遂入殿講賓主之禮相遜再三上卒就主位酒三行移時而退聞尼瑪哈語云三太子見在西京衛護靈寢無它虞金人以甲馬往還裹送遣蕃官五人送入內宿于朝堂始上亦以金銀十六擔縑帛五十牀金玉帶各二為贊而彼供給亦良厚下至從官飲食頗各豐腆於是令百官士庶詣軍前謝二元帥民間獻金帛牛酒者相接于道僧道富民借黃門諸門作功德報大金國相元帥皇子元帥全活生靈之恩大金皇帝聖壽

無疆遣中書侍郎陳過庭繼往河北割地以黃河為界
金要江東江北守臣子弟同往遣簽書樞密院曹輔迎
接康王 金人堅欲上皇出郊再三諭說方稱皇帝仁
孝乃免又云上是日與尼瑪哈阿里貝相見于齊家園署
相見之初尼瑪哈先遣人將齋宮上鵝尾用毡裹然後香
案上望西北拜左右無不欽歎上遂與國相二太子同
坐上為主國相二太子次之宰相親王並列于庭下酒
三行俄頃遣人奏知皇帝日已晚城中軍民不安可早

回駕遂與二敵帥送上馬初見尼瑪哈作二表皆孫覲秉
筆云社稷不損宇宙再安尼瑪哈抹大金二字止欲稱皇
帝又欲易宇宙二字云大金亦宇宙也朝廷皆不得已
而從之和議之後二太子遣國相持書云既往不念故
無可言事至于今良為驚悸康王見在河北便可遣大
臣一人同使命喚回來未審聖意如何凝寒善保壽祉
其書不書名

三日上御祥曦殿百官始造朝敵索全城驃馬開封府

奉聖旨應在京見任除職事官留馬一匹外並赴開封府納限三日敢隱留者全家軍法告者賞錢三千貫於是自御馬而下得七千餘匹歸軍前內班直禁軍自控納之甚有愧色敵帥差官檢視諸庫取絹一千萬疋既而又索采綬如數不要紗右司員外郎司馬朴著作佐郎李若水以奉使和議皆還為侍郎若水吏部朴兵部上既入親從三百餘人皆為敵驅去使跪膝青城後久之乃赦望金國拜謝分配諸蕃寨王時雍兼領開

封尹翌日詔不施行梅執禮罷領尹依舊賓客 上朝
太上皇帝于延福宮悉屏去從衛以何桌從 是日晴
百官入內起居敵使四人從駕入城者索蔡京家屬詔
遣慕容氏并蔡攸續來取李綱吳敏徐處仁王安中劉
韜童師易并蔡靖滕茂實陳良嗣張孝純家屬

四日開封府榜盡數于戚里豪富之家根括金帛赴納
何桌率百官父老僧道等詣軍前謝早至南薰門薄晚
方有蕃官傳令國相元帥指揮日晚道路遠涉不煩出

城令各齊心發願願大金皇帝萬歲乃謝而退少頃御
史臺傳旨應在京職事官並赴尚書省聽候差使

五日金人于城上密栽松柏及實排桺木應守禦之具
悉移內向遣使八人入城自此皆宿都省或朝堂不復
宿都亭驛矣吏部差文武官各二十員隨金人往可河
交地每州各一員中書侍郎陳過庭為交地都提舉乞雅
滿有書到御前其畧云往事不足深念但遣近上大臣

迎康王

云

無名

六日將內外庫絹盡數令禁軍送之軍前自此數旬不
已退回汗損者甚多有詔撫諭四方由軍前差人裹送
以出詔曰大軍登城斂兵不下朕親出郊見兩元帥和
議遂定宗社再安生靈獲全恩德厚甚四方恐隔絕日
久未免疑惑仰諸路監司守臣速行撫諭兩日金使巡
視府庫已封內藏左禦軍前器所王宗濋罷殿帥差橫
行指揮使左言權領先是城破殿班作亂獨言出力遏
之故有是除仍詔授防禦使矣

七日敵于城上悉裁松柏及皮籬巴覆以棘芒 聖旨
諸軍偽作蕃裝劫財物者限十日費賊自首與免罪仍
令五家為保

八日議定金主號為崇天繼統昭德定功修文成武光
聖皇帝 敵使檢校內藏左藏元豐大觀等庫緘封之
九日敵使索米麵各千石與軍前醴酒軍前推馬及割
地使陳過庭出門又要折彥質文呂申家屬夜有使須
索金銀語頗不遜

十日詔遣使臣撫諭諸路復遣中書侍郎陳過庭僉書
樞密院事曹輔宣諭康王議事

十一日聖旨吏部差在京朝官三十六人轉三官借寺
監承赴軍前交兩路地界并取三十六州太守親同往
為質詔吏部尚書王時雍同開封府尹徐秉哲分東西
二廂四少尹十五卿五郎官編詣在京根括金帛出二
榜其一云曉諭戚里權貴豪富之家竭其家資赴府送
納如敢隱匿害埋諸色人許陳告三分支一充賞犯人

重行發配知情藏寄之家依此其一云大金既已登城
斂兵不下保安社稷全活生靈恩德甚厚今來公私所
有本是大金軍前之物義當竭盡以犒設大金軍兵自
皇后家為頭又奉聖旨有能率先竭財犒賞者令王時
雍具名聞奏當優與官爵限三日具所有送納或敢隱
匿並正軍法捕奴婢笞擊問之 以王時雍兼開封府
就本府治事免致官吏分擘不前差祠部員外郎惠柔
民部絹納軍前分三門出敵各以官受之南薰門四百

萬疋東水門鄭門各三百萬疋

十二日斬行門指揮使蔣宣李福虞萬于市先是二十五日城陷是劉延慶劉光國出衆以為車駕已行矣望日大臣請登宣德門撫諭以安衆既妄傳二十七日在御樓方下踏道間蔣宣叩馬請車駕由左掖遽出以避寇既而宣等立馬祥曠殿前邀駕播遷遽甚上曰將我何之宣等云為官家奪得一線好踐路這裏不是官家住處祥曠殿門閉宣等以斧破之門外內侍梁揆等被

殺者十七人上大驚復入內庫劫金寶而去至是詔宣等棄市

十三日遣軍人百姓般絹赴南薰門納凡一千萬疋又遣使表欲割蒲解許之先是軍前諭意金帛不前初十日定下城故凡百應副莫敢少緩絹般去屢有換易悉要山東河北者朝廷以酒肴等遺受納蕃官無算兵士有屢般力乏惰而擲于敵人前者敵衆徐謂曰莫是國家得汝力助 敵遣南京尹胡直孺入城 聞鼎昌卒

先是十一月金人長驅駐軍懷州不行者十餘日乃遣太師王汭楊天吉持誓書來朝王汭楊天吉云兵臨大河去國城咫尺間兩國戰爭累年生靈塗炭之久此緣小人用事起此兵端今欲休兵講和以誓書遣臣等來復兩國之歡好止求割故地以河為界上不得已從之王汭曰今陛下敦信許和乃兩朝士民之幸然未知陛下遣何人報聘上曰待擇人王汭春秋時議和還師以三鎮為約陛下遣張邦昌路允迪割地皆臨期驟進銜

命而往果見中沮遂有失信之事所以至今傾國而來
蓋要理會今春不割地失信公事也今陛下不輟左右
親信大臣一往若如前舉必不取信金國汭等固必看
陛下如何耳上命唐恪等議遂以門下侍郎耿南仲同
知樞密院聶昌聘馬是月二十二日受命昌入對曰陛
下委臣使事臣不敢辭但臣短見深恐許和割地之後
金人失臣復來臨責若止傳國書為無益且兩河之人
素勁至如太原守孤城經十年隆德破而復守人人戰

死者蓋不負祖宗積德之靈陛下恢復之志而今也下
太王遷邠之令用保生靈第恐彼方之民深戀國恩不
忍從敵則未必可號令也不從則臣必為金人所執不
能為陛下努力則臣死不瞑目矣臣若詣軍前議和不
成戎兵南渡乞以便宜分遣徽猷閣直學士叅議官劉
岑朝大夫幹辦官濬牧分路催勤王之師入衛亦臣區
區之願上曰甚好當降指揮昌曰一降指揮必喧傳喧
傳則泄漏泄漏則機事不成矣只乞降下密記淵衷上

遂命取黃絹御書賜昌曰聶昌議和不成戎師南渡取
普絳路入京兆率先請路人馬入衛王室劉岑勝牧取
嵐憲路催促陝西等路勤王軍依奉使法內勝牧與除
直祕閣體念宗社朕不敢忘靖康元年十一月二十二
日御押付聶昌是夜昌同官屬出宜秋門宿瓊林院明
日行至望京橋逢遊騎二十七至永安軍夜半過尼瑪哈
中軍約明日相見尼瑪哈隨行至閭門明日盛甲兵之衛
接見使人其閭門舍下立曰徽傘用榜子贊名引見國

相昌曰國相者金國何官也舍人曰宰相元帥昌曰既為宰相元帥乃金國之臣昌亦南朝大臣止當以敵國臣子客禮相見豈有南朝大臣以臣禮見大金之臣乎舍人曰樞密寧不畏死昌曰主憂臣辱主辱臣死死不足畏節不可屈爭之移時尼瑪哈既不能奪乃以客禮接見于毡帳中往返議論者終日尼瑪哈云我兵已南渡且到城下誤樞密割地回日此方旋師蓋以南朝曾失信也昌曰皇帝仁聖未嘗失信于天下頃以童貫王黼

苟義忘利失信大遼致今日國家有意外之難非國家
失信于大金也且國相今春歃誓結和勒兵不渡今復
背約南侵非金國失信耶尼瑪哈曰不敢廢和議止候得
地昌曰被命而來不敢輒意若國相兵不北還昌雖死
地亦不敢割尼瑪哈大怒入後帳中約退昌昌歸館不給
食者一日加甲兵圍其舍二十八日以太師楊天吉擁
千兵館伴往河東太師王汭以千兵館伴耿南仲往河
北二十九日昌北行不得復見尼瑪哈至閏十一月初四

日至澤州昌召參議官劉岑幹辦官膳牧出臨行親得
御札具說前降之語曰當與公等誓死成事是夜召金
館伴太師楊天吉曰國相待昌之還方肯歸師臣子之
心急于星火奈以道路遙遠莫得疾走欲分遣屬官往
東路昌行西路會于河中不二十日之間此事畢矣庶
得國相早肯班師楊天吉等曰謹諾遂分差敵使王敵
郭天信以五百兵館伴劉岑滕牧往河東楊天吉親伴
昌行其議遂定明早分路而行十二日昌至絳州城下

城門不開郡官逃盡惟有監倉趙子清者領州事郡人聞割地大怒出兵掩殺是日昌遇禍十二日也

十四日兵馬大元帥皇弟康王如大名府

十五日申時禮部火延燒刑部及曉方息開封府等處鉛金銀共四千萬 是日火自尚書省延及祠部吏部

刑部

十六日立春上遣送土牛條杖往二壁尼瑪哈不受傳語趙王不用許多禮數又遣使語二帥欲開諸門令細民

樵採日給尼 不可曰且令拆屋燒語類此凡遣造敵

壁議事多不得見二帥或踞坐帳中使甲士執引使者

趨拜廷下司馬朴使之問其族曰先祖太師丞相光帥

曰賢者之後乃稍加禮金人歸胡直孺及其二子有旨

許民于艮嶽採花亭榭為薪敵薄城以來每夜日晡輒

鼓鼙四發及得城復擊于城上謂之平安鼓城中牆屋

皆震聞者不聊生自是間一擊之不復如往日也 皇

弟大元帥康王次大名府 聖旨凡虜財物不自首為

獲者族誅近隣不首准軍法軍人作過統制官不覺察除名勒停以有詐贓人作過也

十八日詔瑤華宮人遷居延寧宮

二十日雪移金帛于市易務受納

二十一日雪毀拆艮嶽亭榭爭奪死者千餘人百物踊貴死者甚衆遣使往軍前稟金銀數是日萬歲山屋摧壓死者四十餘人

二十二日至二十三日大雪及尺餘至夜方霽街巷死

者甚衆曹輔軍前回去至曹州不見康王一路金銀連營觀文殿學士提舉西京崇福宮徐處仁牒以東道總管胡尚書兵潰不知存亡令准漸監司權上件職領兵赴援冀安王室當所見起發前去會議施行

二十四日開寶寺火差祠部員外郎喻汝礪毀高俅賜第鬻其材于民尚書省榜連金人書云十二月二十三日固倫尼伊拉齊貝勒副元帥皇太子元帥謹致書于大宋皇帝近日差官入檢視府藏承庫藏劄目絹一

色約有一千四百萬疋于內唯取犒賞所須一千萬疋
今承來示披尋深意恐似百方取索假以為辭於理未
若此者初欲破城時本擬縱兵但緣不忍以故約束今
來賞勞諸軍議定合用金一百萬錠銀五百萬錠緞子
依絹數不限官私早望應副見在庫絹雖見有餘惟取
所須此金銀緞子亦係所須之外亦不必取昨來本府
再舉之際累承示諭當致金帛費耗驗今所諭似謬前
言且冀亮悉無用浮詞謹奉書承達不宣謹白尚書省

奉聖旨令出榜曉諭令備錄國書在前勘會大金軍既登城斂兵不下保全一城生靈恩德甚厚軍前金銀表段自當竭力應副內藏元豐大觀等庫及龍德寧德兩宮御前皇后閣皇太子宮并臣僚之家已根括數目外大段缺少令曉諭權貴凡戚里豪富凡有金銀表段人戶各仰體認大金之恩足雨以上盡行輸納差王時雍管東北壁徐秉哲西南壁陳求道管東壁王詔受納王及之夏承北壁李佩受納依諸家元納到封頭斤交割

赴大金軍前如敢隱留及官吏乞覓并仰一面措置施行比榜出都人大恐差官分詣諸路聞潁昌府破死者大半故老之家盡虜置軍中 詔禮刑部遺火人吏自開封府移理獄

二十五日張徽免試為中書舍人 徐秉哲以根括金銀數目浩瀚乞添差蘇昌時充司錄從之 金人入國子監取官書凡王安石說皆棄之

二十六日開封府榜金銀疋帛限三日盡數送納如有

窖藏寄收出限不納之家許諸色人并本家人力女使
經府陳告以所藏之物三分之一估價充賞其人力女
使著即時令逐取便 邵溥應副城南蕃官博尼聞其
國相主謀者高書劉尚侍二太子主謀者劉中及棟摩
國王大綱謀事諸帥預事郭藥師已罷兵柄矣其有密
謀即各馳馬于空迥無人之境盤旋數刻而後反其衆
不議以高下皆環坐一室盡畫字于灰以定可否不復
聞其密如此 是日輸絹數疋 敵賈香詣文宣王武

成王祠及相國寺

二十八日開封少尹榜許中下戶以金銀聽入官中並無阻節范寅敷事往來催促四壁專括金銀東壁受納官王紹罷差職方王雩駕部陳芾疾速前去管勾矣
敵取秘書錄及所藏古器

二十九日元帥康王如東平府 先是辛丑壬寅年朝廷新得燕山調河東京東京西之民轉菽粟金帛器甲往燕山絡繹于道而燕山初定盜賊不可勝數剽劫行

李商旅遂絕部押官往往在雄州不敢北去而燕雲兩
路官吏散處中國其哨聚之民並引處內地中中國之民
日夜疑之而官吏亦不復以禮待遇相忿恨數至喧爭
至乙巳歲秋平陽府就糧議軍劉嗣初反殺掠居民轉
至懷州城下兵馬鈴轄與兩隊將將與之戰屬沁水暴
漲官軍轄判鈴及兩隊將戰死朝廷大發兵擊之嗣初
遁歸雲中是歲正月十九日也嗣初之反晉絳汾潞懷
衛皆被其害而澤州當郡之中其守高世由扞禦有方

獨不入境既朝廷賞功澤州不預六月末中奉大夫直
秘閣霍安國知懷州安國嘗為燕山路轉運判官頗習
邊事數為其僚言金人必為朝廷患此州亦不可不備
乃計度增城濬濠繕治器甲安國在燕山時郭藥師嘗
欲有燕山之地不煩朝廷置帥人以為然而安國獨
深然之乃具以奏坐此放罷幕府憮然以不至若此也
十二月童貫自太原府回行李甚遽既渡南乃聞金人
已破代州知代州李嗣本降是月九日也朝廷以宇文

虛中為軍前宣諭使知懷州而回後數日聞虛中為亂
兵所劫僅以身免已而上皇降詔傳位于淵聖靖康元
年丙午金人二太子斡里雅希自河北入侵所過不攻城
遂進逼京師三月金人河北所入兵退其游騎至衛州
尼瑪哈自代州入侵所過攻城既陷代州所至石嶺關將
耿守忠本燕人率衆降之金人遂至太原城下知太原
府張孝純副總管王稟以勝捷兵三千人分兵為之尼瑪
哈引兵出南北關陷威勝軍是歲二月也敵至隆慶府

知府張確憑城與之戰二日而城陷張確死之尼瑪哈進
屯高平縣令朝廷遣簽書樞密院路允迪使金國割三
關四鎮之地二月末允迪至懷州盤桓數日金人知允
迪出使必欲見允迪而後止懷州士民數千叩閣請允
迪至高平尼瑪哈退北關太原城未破也初尼瑪哈至高平
澤州通判時敦往犒之事既定朝廷以知州高世由為
直祕閣賞其能使敵不至城下也尼瑪哈既過北關于太
原城下舊城而居之號曰元帥行府盡限屬縣運芻粟

為久居之計朝廷以姚古為河東制置副使古至懷州
三月二十四日別將陳迪擒大金所置隆德知府姚璠
璠燕人自言系出頴昌頗有善政潞人喜之二十五日
又遣將入威勝軍逐金人所置知軍事古引兵至威勝
軍傳聞尼瑪哈將至古一夕遁歸隆德府种師中自河北
逐金人出界田土門路入河東金人以精騎邀擊于榆
次縣殺師中麾下兵皆潰五月五日也朝廷以知樞密
院李綱為宣撫使督諸將救太原又以資政殿學士劉

榦為宣撫副使副使中大夫直祕閣范世推起鼎澧兵
來河東始為叅謀俄為徽猷閣待制宣撫判官李綱至
懷州徽猷閣待制樞密都承旨宣撫司叅謀兼河東路
幹辦公事折彥質直祕閣沈琯宣義郎郭直中主管機宜
部員外郎裴廩直祕閣沈琯宣義郎郭直中主管機宜
文字在懷州三員樞密院編修官鄒柄田直朝奉大夫
韓唯幹辦公事主管文字官趙柟趙戩張叔夜陳湯求
梁澤民張牧等數十人又以武功大夫防禦使解潛為

置制使代姚古以种师中統西蕃人馬以許季烈為前
統制于是解潛屯威勝軍劉韜屯遼州王以寧節制浙
兵張灝為察訪使灝孝純之子也與府州折可求等皆
屯汾州又范瓊率山東兵以及招到張仙劉浩等屯南
北關山間皆去太原府五程約以三道兵並進會于太
原城下遣郭執中軍潛引兵先出南關傅于坡上金人
迎潛擊之軍大敗潛與數十騎走山間种師中亦敗走
所部西番兵間有一二回者郭執中折彥質與河東轉

運使高衛錢歸善遁至隆德府張灝引兵攻文水縣拔之進軍數十里金人出騎大敗八月七日也灝與數騎走歸于重劫汾州金人兵回遼州劉韜引騎衆取間道欲歸河北路與金人游騎相遇懷州將領王彥隨劉韜軍戰死于山間是時尼瑪哈在雲中留金將尼楚赫大王在太原城下八月五日尼瑪哈至太原至九月五日城遂陷張孝純被擒俄釋之又以為雲中府路密刺殺副總管王稟盡殺勝捷軍三千餘人九月十九日朝廷召李

綱回以折彥直為宣撫判官范世雄至龍德州罷歸折彥直至懷州郭執中以宣教郎直秘閣為參謀富直宗以宣義郎秘書省正字為參議宣議郎王弗承恭郎為幹辦公事迪功郎張絳機宜走馬承授王褒往來河東屢言將帥過失召范瓊以寧歸祠俄而以寧罷范瓊赴闕鼎澧路兵三千人在澤州餘懷州朝廷盡罷李綱所遣置官屬以折彥直專主和議嘗棄太原故也又以解潛為參謀又罷之進彥質龍圖閣直學士宣撫副使彥

質以郭浩為都統制許大倫副之十月八日金人陷汾
州張戢死之十日以隆德平陽為兩帥以懷州隸於隆
德以張有極為集英殿修撰隆德府安撫使以高衛為
徽猷閣待制平陽府安撫使衛米至平陽而平陽已為
契丹兵所破金人進據之矣又以郝渝為河東提舉常
加兩路守臣並帶內安撫使十月懷州官因見彥質曰
宣撫使兵馬久在城裏困倦甚矣一兩日欲去西山下
排隊少令意思舒豁次日遂與富直柔王弗張絳同行

欲宿萬善鎮去州二十五日止太行山下中大夫右文殿修撰懷州安撫使霍安國差官應副彥質至山下逢李若水自大金奉使回屏人密語知敵已南向彥質大懼其夜還鎮遂挺身遁歸河陽留諸軍共二萬人在懷州續得省劄云不肯守盟約延遲造師將欲前來河北人民盡許渡河過南居舍林木皆焚燒務令虜無所得次日早懷州得彥質劄子令郭浩許大倫統押宣撫司兵馬來河陽令曹璋都統制鼎澧兵在懷州比及辰時

浩大倫亦去次日敵至城外令懷州速降云今已取了
晉絳太原且看太原猶自取了則懷州何勞攻也汝且
與守臣說令將狀來時尼瑪哈已陷澤州知州高世由通
判呂民中降金傳譯云汝南宋上皇數年前遣人自海
上與我大金結盟共滅契丹當時元約九州土地人民
歸汝南宋子女玉帛歸我大金及至各自興兵汝南宋
並不曾取得九州却是我大金取了燕山府為有以前
盟約將士土地人民一齊交割與汝是我大有恩德于

汝南宋也既無以謝我遂將營平兩州與大金而營平
兩州戶口多在汝南宋界裏我為民父母為見有百姓
父母妻子離散情實不忍移檄去汝南宋取兩州戶口
汝南宋都不發遣亦無回文不肯依約我便興兵是時
却是我興兵來及至汴城下汝上皇便不坐却太子為
主見兵勢懼見攻破遂差使人將三關四鎮之地獻與
我大金我信是實頭言語便引向行府至高平縣見汝
南宋差路樞密來我便回去更不侵掠是我又有大恩

德于汝南宋也却背盟約密諭三鎮堅守不付又召天下兵援太原今日所以興師師出不可謂之無名我本得一齊都要汝南宋土地又為大金皇帝聖旨教且以見流黃河為界汝懷州合是我大金撫定去處合便歸降我守臣霍安國遣人再三說諭尼瑪哈以為不若與大宋皇帝商量三關四鎮歸大金每歲更添歲幣于事宜足可評薄尼瑪哈曰也得與我三關四鎮每歲更與歲幣一百萬來汝且恁地差人去南宋皇帝處說且留軍在

懷州澤州之間等汝回已前發去者先鋒難為末一次見第使却喚回持指揮教不得胡亂殺人使人曰其如禪馬國王右副元帥在河北不知此意若去攻打如何處置尼鴉哈曰容易容易待教說與遂申文與霍安國令申奏朝廷十八日無回報尼鴉哈大怒曰汝南宋恁地無信行從今日以後更有文字來我也不見汝且說與主州一任汝門忠孝出戰亦得守城亦得只我是不得住手攻打也時懷州有正兵千人鼎澧兵三千餘人河內

修城破淮備將領武翊郎王英投濠而死尼瑪哈引懷州
官立其前先引第一行知州通判鈐轄都監部隊鼎澧
路部隊將共一作行次州官一行次監官一行次縣官
一行尼瑪哈使番官傳令曰汝許多人是誰不肯降霍安
國云安國是宋朝守臣是安國率衆不降又問第一行
諸官曰只是知州不降是汝門多不降皆說某等與知
州一般皆不肯降又引令與東北望大金拜霍安國曰
安國是大宋之臣不曾得趙官家文字不敢拜尼瑪哈令

引盡脫去衣服用索反縛又令高尚書說與其他人曰
汝門多是小官不干汝事亦不要汝降各赦罪仍將知
州霍安國奉議郎通判林淵武功大夫濟州防禦使兵
馬今轉張彭年武經郎都監趙士諱武郎都監張諶
修武郎都監于潛保義郎統領鼎澧路兵馬沈敦秉義
郎同統領張行中及南兵部隊將五人同時被害

靖康要錄卷十